

## Siunnersuummut nassuiaatit

### **Nassuiaatit nalinginnaasut**

#### **1. Aallaqqaasiut**

Siunnersuutip saqqummiunneqartup siunertaraa Nuup kiisalu Qasigiannuguit Aasiaallu pilersorneqarnerannut erngup nukinganik nukissiorfinnik taakkunungalugu atatillugu atortunik sanaartornermut, aningaasalersuinermit ingerlatsinermullu killiliussatut atugassarititaasut pillugit Inatsisartut inatsisaanni (sanaartornissamat inatsit) ilaasunik erngup nukinganik nukissiorfiliornissat aningaasaliiffiginissaannut pitsaanerpaamik aningaasaqarnikkut atugassarititaasut annertusineqarnissaat isumaqatigiissuteqarsinnaanissarlu.

Siunnersuummi periarfissinneqarput:

- Sanaartornissamat suliniutinut aningaasaliinissamat pisariaqartinneqartut matussusernissaat Danmarkip naalagaaffianit aamma/imaluunniit aningaasarsiutigalugu taarsigassarsititsisartuni avataanit aningaasaliisartunit taarsigassarsinikkut aningaasaliissuteqarnikkut.
- Naalackersuisut taarsigassarsiarineqartut Nukissiorfinnut imaluunniit aktiaatileqatigiiffimmut Namminersorlutik Oqartussanit pigineqartumut taarsigassarsiariteqqissinnaagaat.
- Sanaartornissamat inatsimmi ilaasut erngup nukinganik nukissiorfinnut sanaartukkat, aningaasaliinerit ingerlatsinerillu aktiaatileqatigiiffimmut Namminersorlutik Oqartussanit pigineqartumut tamakkiisumik ilaannakortumilluunniit tunniunneqarsinnaasasut.
- Nukissiorfinnut imaluunniit aktiaatileqatigiiffimmut Namminersorlutik Oqartussanit pigineqartumut naalagaaffimmit taarsigassarsititseqqiinissaq pillugu isumaqatiginniarlunilu isumaqatigiissuteqarsinnaaneq.

#### **2. Siunnersuummi immikkoortut pingaarnertit**

##### *2.1.1. Pisinnaatitaaffik atuuttoq*

Inatsimmi atuuttumi (sanaartornissamat inatsit) § 5 imm. 1-imi aamma 2-mi aalajangersarneqarpoq, Naalackersuisut annerpaamik katillugit 3,1 mia. kr. DKK-nik akiitsoqalerlutik taarsigassarsinnaasut aamma Naalackersuisut imm. 1 naapertorlugu taarsigassarsiatik Nukissiorfinnut taarsigassarsiariteqqissinnaavaat inatsimmi ilaasunik sanaartornissanut suliniutit aningaasalersornissaannut. Sanaartornissamat inatsit landskarsip taarsigassarsiaanik Namminersorlutik Oqartussat aktieselskabiutaanut taarsigassarsititseqqiinissamat pisinnaatitsinermik imaqqanngilaq, aalajangersakkami

Nukissiorfiit Namminersorlutik Oqartussanit namminersortitatut aaqqissuussaasoq taamaallaat taaneqarsimammat. Nukissiorfiit landskarsi avaqqullugu sanaartornissamut aningaasaliissutissanut namminneerlutik taarsigassarsinnaanngillat. Aalajangersakkap tamatuma ingerlaqqittumillu malitsigisaani naalagaaffimmit taarsigassarsinermut inatsit naapertorlugu naalagaaffimmit taarsigassarsianik Nukissiorfimmut taarsigassarsitseqqiisoqarsinnaanngilaq.

Sanaartornissamut inatsimmi § 6-imi aalajangersakkami aalajangerneqarpoq Naalakkersuisut sanaartornissamut, aningaasaliinermut ingerlatsinermullu namminersortumik ataatsimik arlalinnilluunniit isumaqatigiissuteqarsinnaasut. Aalajangersakkami tassani BOT-mik isumaqatigiissuteqarsinnaaneq periarfissaqartinneqarpoq. BOT-mik isumaqatigiissutip nassatarisaanik Namminersorlutik Oqartussat erngup nukinganik nukissiorfinnik atortuinillu aningaasaliinermut, pilersitsinermut ingerlatsinermullu avataani aningaasaliisartunik isumaqatigiissuteqarsinnaapput kiisalu Namminersorlutik Oqartussanut taakkuninnga piffissami aalajangerneqarsimasumi tunniussineq pillugu. Isumaqatigiissuteqarnermi erngup nukinganik nukissiorfinnik pilersitsinermut ingerlatsinermullu atatillugu piffissami aalajangerneqartumi navianaateqarsinnaasunut avataani aningaasaliisut akisussaaffimmik tiguseqataassapput piginneqataallutillu, ilutigitilluguli aningaasaliisoq missingersuutunik qaangiinerni ingerlatsinermilu navianaateqarsinnaasunik tigusinikkut iluanaaruteqarnissaq naatsorsuutigisinnaassallugu.

### *2.1.2. Siunnersuut*

Inatsisissatut siunnersuummi Naalakkersuisut aningaasalersuinissaq pillugu Naalagaaffimmik isumaqatiginninniarnissamut annertusisamik pisinnaatinneqassapput, tassuunakkut Nukissiorfinnut imaluunniit Namminersorlutik Oqartussat selskabiutaannut sanaartornissamut aningaasaliinissamut il.il. Naalagaaffiup taarsigassarsitseqqiisinnaalernissaanut tunngavissamik aqqutissarsiussallutik. Naalagaaffimmit taarsigassarsitseqqiineq aningaasarsiuugalugu taarsigassarsititsisartunut sanilliullugit qularnanngilluinnartumik appasinnerusumik ernialerlugu pisinnaassaaq.

Naalakkersuisut Danmarkimi Finansministeriamut saaffiginnissuteqarpoq naalagaaffimmit taarsigassarsinissaq pillugu oqaloqatigiinnissaq siunertaralugu. Ulloq 14. marsi 2022 qanoq pilersaaruteqarnermik nalunaaruteqartoqarpoq, tassani Danmarkimi naalakkersuisut Naalakkersuisullu isumaqatigiissutugalugu Finansministeriamit Aningaasaqarnermullu Naalakkersuisoqarfimmit ataatsimut paasiniarneqassasoq Kalaallit Nunaanni erngup nukinganik nukissiorinissamik suliniutinut aalajangersimasunut aningaasaliinermut atatillugu Danmarkip peqataasinna - taamaassinnaappallu qanoq - misissuiffigineqassasoq.

Naalagaaffik taarsigassarsititseqqiisinnaavoq - imaappoq finansministeriap taarsigassarsiai kingorna naalagaaffiup suliffeqarfiutaanut selskabiutaanullu il.il.

taarsigassarsiariteqqinneqartunik – naalagaaffiup taarsigassarsinissamut pisinnaatinneqarnera pillugu inatsit nr. 1079, 22. december 1993-imeersumi kingornalu allannguuteqartumi (naalagaaffimmit taarsigassarsineq pillugu inatsit) aamma naalagaaffiup suliffeqarfiutai ataasiakkaat selskabiutaalu il.il. pillugit immikkut inatsimmi pisinnaatinneqartunik.

Naalagaaffiup ingerlatseqatigiiffiunut il.il. naalagaaffiup taarsigassarsititseqqinnissaanut tamatumunnga isumaqatigiissuteqarsimanissaq tunngavissaatinneqarpoq, tassani tamatumunnga atugassarititaasut aalajangersarneqarsimassallutik. Aningaasaliinissamut isumaqatigiissuteqarnissamik aalajangiineq aningaasaliinermut aningaasaliussanullu pilersaarutit taarsigassarsisumit suliarineqartunik kingornalu naalagaaffimmit akuerineqartunik tunngaveqassaaq. Nukissiorfiit imaluunniit Namminersorlutik Oqartussat selskabiutaat pilersaarummi akuerineqartumi najoqqutassiat tunngavigalugit taarsigassaarsissapput.

Aningaasaliinermut pilersaarut katillugit aningaasaliiffigineqarnissamik pisariaqartinneqartunik sanaartornissamut inatsimmi ilanngunneqartunik ilaqassaaq. Aningaasaliinissamut aningaasalersuinissamullu pilersaarummik ukiumoortumik akuersinermut atatillugu taarsigassarsiat qanoq annertutigisut naalagaaffimmit taarsigassarsiarineqarnissaannik qinnuteqartoqarnissaanik tamatumani taarsersuinissamik isummertoqarsimanissaanik piumasaqaatitaqarpoq. Tamatumunnga atatillugu suliffeqarfiup naalagaaffimmit taarsigassarsinissamut atugassarititaasut aalajangersarneqassapput. Naalagaaffimmit taarsigassarsinermut piumasaqaataavoq ataavartumik erniaqarlutillu akilersorneqassasut. Taarsigassarsianut erniat ilaatigut taarsigassarsiat akilersornissaannut piffissaliussamut taarsersuinerullu isikkuanut takussutissaassapput, taarsigassarsiat akilersorneqarsinnaanngimmata naalagaaffiup taarsigassarsinermi atugassarititaasunit pitsaaneruseqartumik atugassaartoqarsinnaanngimmat.

Sanaartornissamut inatsit naapertorlugu sanaartornissat aningaasalersorneqarnissaannut Nukissiorfinnut imaluunniit Namminersorlutik Oqartussat selskabiutaannut naalagaaffimmit taarsigassarsiteqqinneqarnissamik isumaqatiginninniarlunilu isumaqatigiissuteqarsinnaassagaanni naalagaaffimmit taarsigassarsineq pillugu inatsimmi taarsigassarsititseqqiinermut piumasaqaatinik naammassinnittunik atugassarititaasunik piumasaqaatinillu isumaqatiginninniarnissaq pisariaqassaaq. Siunnersuummi pisinnaatitsissummik ilanngussisoqarpoq Naalakkersuisut siunertamut tassunga sanaartornissamut suliniutip aaqquissuusaanerani inatsisitigullu atugassarititaasunik nalimmassaanissamut pisinnaatinneqassallutik, tamatumunnga ilanngullugu Namminersorlutik Oqartussat aktieselskabiutaanut suliassanik sanaartornissamut inatsimmi

ilaatinneqartunik tamatumunngalu atatillugu aningaasartuutunik tunniussisoqassanersoq. Suliassat sanaartornermut inatsimmi pineqartunut ilaasut isumaginissaat siunertaralugu aktiaatileqatigiiffimmik pilersitsinissamut, sanaartornermullu aningaasartuutitut tamatumunnga atasunut inatsimmi tunngavissaqalersitsinissaq tamatumani pisariaqartussaavoq.

Sanaartornissamut suliassanut sanaartornissamut inatsimmi ilaatinneqartunut aningaasaliinermi isumaqatiginninniarnerni taarsigassarsinermilu piumasaqaatinik aalajangiinerni pissutsit arlallit Naalagaaffimmit avataaniillu taarsigassarsititsisumit allamit pingaartinneqassapput. Taamaalilluni aningaasaliisussap naliliineranut ilaatigut sunniuteqarsimavoq erngup nukinganik nukissiorfimmi suliat Nukissiorfiup suliaanit allanit avissaartinneqarsinnaanersut, taarsigassarsinermi pigisat qularnaveeqqutigineqarsinnaanersut, Namminersorlutik Oqartussat aktieselskabiutaannut inatsisitigut atugassarititaasut aamma selskabip aningaasanngorlugu nalinga. Aningaasaliinerup naalagaaffimmit taarsigassarsinikkut aningaasalersuinerillu allat atorlugit pissarsiarineqarsimanerat taarsigassarsiisumut aamma isumaqarsinnaavoq.

Inatsisissatut siunnersuummi Naalakkersuisut pisinnaatinneqaassapput piumasaqaatit tunngaviusut arlaqartut aaqqiissuteqarfiginissaannut saaffiginninnissamut isumaqatiginninniarnissamullu, tamatumunnga ilanngullugu qulaani taaneqartutut sapinngisamik pitsaanerpaamik atugassaqarluni taarsigassarsinnaanissamut.

### **3. Pisortanut aningaasaqarnikkut allaffissornikkullu kingunerisassai**

Siunnersuut tunngaviusumik aningaasaqarnikkut naatsorsuutitut sanaartornissamut inatsimmi tunngavigineqartunut allannguaviannngilaq siunnersuullu taamaallaat sanaartornissami suliassat aningaasalersorneqarnissaannut isumaqatiginninniarnissamut isumaqatigiissuteqarnissamullu annertusisamik atugassaqartitsissaaq aamma siunnersuut taamaallaat naalagaaffimmit taarsigassarsititseqqiinnermut aningaasaliiffinniillu allanit taarsigassarsinermi piumasaqaatit naapertorlugit sanaartornissamut suliassanut aningaasaliinissamut isumaqatigininniarnernut isumaqatigiissuteqarnissanullu annertusisamik

atugassaqaarnissamik nassataqarluni. Siunnersuut taamaammat pisortani aningaasaqaarnikkut allaffissornikkullu kinguneqarnavianngilaq.

**4. Inuussutissarsiortunut aningaasaqaarnikkut allaffissornikkullu kingunerisassai**  
Siunnersuut inuussutissarsiortunut kingunerisassaqaanngilaq.

**5. Avatangiisinut, pinngortitamut inuillu peqqissusaannut kingunerisassai**  
Siunnersuut avatangiisinut, pinngortitamut imaluunniit inuit peqqissusaannut kingunerisassaqaanngilaq.

**6. Innuttaasunut kingunerisassai**  
Siunnersuut innuttaasunut aningaasaqaarnikkut imaluunniit allaffissornikkut kingunerisassaqaanngilaq.

**7. Allatigut kingunerisassai pingaaruteqartut**  
Siunnersuut allatigut pingaaruteqartunik kingunerisassaqaanngilaq.

**8. Oqartussaasunut soqutigisaqaqatigiiffinnullu il.il. tusarniaaneq**  
Siunnersuut piffissami 2022-mi ulloq 3. juli 2022 aallarnerfigalugu ulloq 3. august 2022 tungaanut soqutigisaqartunut makkununga tusarniaassutigineqarpoq:  
Avannaata Kommunia, Kommune Qeqertalik, Qeqqata Kommunia, Kommuneqarfik Sermersooq, Kommune Kujalleq, KANUNUPE, SIK, GE, Mittarfeqarfiit, Nukissiorfiit, Royal Arctic Line A/S, Asiaq, Grønlandsbanken A/S, BankNordik, Visit Greenland, Transparency Greenland, WWF Greenland, KNAPK, Pinngortitaleriffik, Timmiaq, KNI A/S aamma Nunatta Katersugaasivia Allagaateqarfialu.

Tamatuma saniatigut siunnersuut piffissami matuma siuliani taaneqartumi tusarniaanermut nittartakkami pissarsiarineqarsinnaasimavoq.

Tusarniaanermut akissuteqaatini tiguneqartuni immikkoortut pingaarnerit ilanngussaq 2-mi matuma kingulianiittumi eqqartorneqarput oqaaseqarfigineqarlutillu.

## Siunnersuummi aalajangersakkanut ataasiakkaanut nassuiaatit

### § 1-imut

Nr. 1-imut.

Aalajangersagaq Nukissiorfinnut imaluunniit Namminersorlutik Oqartussat aktieselskabiutaanut sanaartornissamut suliniutinut aningaasartuutinullu sanaartornissamut inatsimmiittunut landskarsip taarsigassarsiaanik taarsigassarsititseqqinnissamut Naalackersuisunut pisinnaatitsivoq. Aalajangersakkap sanaartornissamut inatsimmi § 5-imi aalajangersagaq atuuttoq ingerlateqqippaa § 5 imm. 2-mi imaattumik allannguuteqarluni Naalackersuisut Namminersorlutik Oqartussat aktieselskabiutaannut taarsigassarsititseqqiisinnaassasut.

Nunatta karsiata taarsigassarsinera kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaat nr. 26, 28. november 2016-imeersumi (missingersuutinut inatsit) § 6-imi killissaliussat iluanni pissaaq. Nalilerneqarpoq sanaartornissamut inatsisip ilaatut sanaartornissamik suliniutinik tamakkiisumik aningaasalersuinissamut Namminersorlutik Oqartussat aktieselskabiutaannut taarsigassarsineq missingersuutinut inatsimmi § 6-imi piumasaqaatinik Inatsisartut inatsisaanni atuuttumi oqaaseqaatini itinerusumik nassuiarneqarsimasunik naammassinnissasoq.

Nr. 2-mut.

§ 6-imi aalajangersagaq atuuttoq atorunnaarsinneqassaaq. § 6-imi atuuttumi aalajangersakkap Naalackersuisut sanaartukkanik sanaartornissamut inatsimmi ilaatinneqartunik sanaartornissamik, aningaasaliinermik ingerlatsinermillu namminersortumik ataatsimk arlalinnilluunniit BOT-mik isumaqatigiissuteqarnissamik pisinnaatippaa. BOT-imik isumaqatigiissuteqarneq aningaasaqarnikkut pitsaannginnerusutut nalilerneqarpoq BOT-imillu suliarinnittussarsiorneq erngup nukinganik nukissiorfiliornissap kinguartinneqaratarsinnaaneramik nassataqarsinnaalluni. Taakku tunngavigalugit aalajangersakkap atuuttup atorunnaarsinneqarnissaa siunnersuutigineqarpoq.

(§ 6 imm. 1-imut)

Aalajangersakkatut siunnersuutigineqartoq Naalackersuisut suliassat §§ 2-4-mi ilaatinneqartut aningaasartuutillu taakkununga attuumassuteqartut Namminersorlutik Oqartussat tamakkiisumik ilaannakortumilluunniit aktieselskabiutaannut tunniunneqarnisaannik aalajangiisinnaatippaat. Pisinnaatitsineq naalagaaffimmit taarsigassarsititseqqinermi atugassarititaasut pillugit isumaqatiginninniarnernut imaluunniit taarsigassarsititsisunik allanik isumaqatiginninniarnernut atatillugu atuutissaaq. Naalackersuisut atuuffik tamanna

Namminersorlutik Oqartussat aktieselskabiisa ukiumoortumik ataatsimeersuarneranni atussavaat Naalakkersuisullu atuuffimminnut tassunga atatillugu selskabip aaqqissuussaankkut atugassarititaanut aalajangiisinnaassapput, tamatumunnga ilanngullugit sanaartornissamut inatsisip siunertaanik naammassinnissamut inatsillu naapertorlugu sanaartornissamik suliniutit aningaasalersornissaannut taarsigassarsinissamut piumasaqaatinik naammassinnissinnaasunik ileqqoreqqusanik, aqutsinermik il.il, aalajangersaanermi. Suliassat §§ 2-4-mi pineqartunut ilaasut tunniunneqarnissaannut, erngup nukinganik innaallagissiorfinnik sanaartornermut inatsimmi pineqartunut ilaasunik sanaartornissaq, aningaasalersuinissaq ingerlatsinissarlu siunertaralugu aktiaatileqatigiiffimmik Namminersorlutik Oqartussanit pigineqartumik pilersitsinissamut inatsimmi tunggavissaqalersitsinissaq pisariaqartussaavoq.

(§ 6 imm. 2-imut)

Siunnersuutigineqarpoq Naalakkersuisut Namminersorlutik Oqartussat aktieselskabiutaanni, sanaartornissamut inatsit naapertorlugu erngup nukinganik nukissiorfinnik sanaartornermut, aningaasaliinermut ingerlatsinermillu suliassanik tunineqartunut, aningaasaatit pillugit isumaqatigiissuteqarnissamut imaluunniit aningaasatilluunniit amerlinissaannut pisinnaatinneqassasut. Aningaasaatit amerlineqarnerat nalilinnik erngup nukinganik nukissiorfiit pigisaanik tunniussinikkut imaluunniit aningaasanik piginneqatigiissutinik tunniussinikkut aningaasanilluunniit taarsigassarsititsinikkut pisinnaavoq. Selskabip aningaasaataasa annertussusaannik aalajangersaaneq katiterinerlu taarsigassarsitinneqarnermi piumasaqaatinut aalajangiisuussapput, pissutsillu taakku taarsigassarsititsisunik isumaqatiginninniarnermi isumaqatiginninniutigineqassallutik, naalagaaffimmit taarsigassarsititseqqiineruppat avataaniilluunniit taarsigassarsititsisartunit taarsigassarsineruppat.

(§ 6 imm. 3-imut)

Siunnersuutigineqarpoq Naalakkersuisut nunatta karsiata taarsigassarsinissaanut killissaliussat 3,1 mia. koruunit inatsimmi § 5, imm. 1-imi aalajangersarneqartut iluanni Namminersorlutik Oqartussat aktieselskabiutaanni taarsigassarsianut qularnaveeqquisiinnaanermik pisinnaatinneqassasut. Namminersorlutik Oqartussat selskabiutigisat taarsigassarsiaannut qularnaveeqqusiinninnissamik tunggavik ukiorpassuarni aalajangiusimavaat. Illersorneqarsinnaasumik ingerlatsinerup qulakkeerneqarnissaanik selskabini siulersuisut ukkataqarnissaat tamatumani qulakkeerniarneqarsimavoq, tamatumunnga ilanngullugu aktieselskabit pillugit inatsit naapertorlugu ilaatigut pilersaarutit, missingersuutit assigisaallu malitseqartinneqartarnissaa, kiisalu selskabit akiliisinnaassuseqarnerat, pisiniarluni inniminniinerit, pingaarnertut aalajangiinerit, sillimmasiisarfinni atugassarititaasut tamakkiisut, aningaasaqarnikkut atugassarititaasut, aningaasat ingerlaarnerat immikkullu navianaateqartut pillugit nalunaarusiat isummerfigineqarlutik. Namminersorlutik Oqartussat

avataanit taarsigassarsititsisartunit Namminersorlutik Oqartussat aktieselskabiutaannut taarsigassarsianut qularnaveeqqusiinerat taarsigassarsititsisartut piumasagaatinik isumaqatiginninniarnerni ilaatinneqarsinnaavoq.

Erngup nukinganik nukissiorfinnik pineqartunik sanaartorneq nunap soqutigisaanut qanorluunniit tungaviusorujussuussapput, suliniutillu aningaasaqarnikkut kipusuussappata Namminersorlutik Oqartussat akisussaatinneqarnissaat naatsorsuutigineqarsinnaassalluni.

*§ 2-mut*

Aalajangersakkami siunnersuutip ulloq atuutilerfissaa allassimavoq. Inatsisartut inatsisaanik allannguutip ulloq 1. decembari 2022 atuutilerneqarnissaa siunnersuutigineqarpoq.



## ILANNGUSSAQ 1

<b>Inatsisissatut siunnersuut inatsimmut atuuttumut sanilliullugu</b>	
<i>Oqaasertat atuuttut</i>	<i>Inatsisissamut siunnersuut</i>
	<b>§ 1</b> Nuup kiisalu Qasigiannnguit Aasiaallu pilersorneqarnerannut erngup nukinganik nukissiorfinnik taakkununngalu atatillugu atortunik sanaartornermut, aningaasalersuineranut ingerlatsinermullu killiliussatut atugassarititaasut pillugit Inatsisartut inatsisaat nr. 22, 1. december 2021-meersumi tulliuttut allannngortinneqassapput:
§ 5, imm. 2: ”Naalakkersuisut taarsigassarsiatut aningaasaliissutissat imm. 1 naapertorlugu Nukissiorfiit taarsigassarsiteqqissinnaavaat, inatsit naapertorlugu sanaartugassat aningaasalersorneqarnissaannut atatillugu.”	<b>1.</b> § 5, imm. 2, imannak oqaasertalerneqarpoq: ” Naalakkersuisut imm. 1 naapertorlugu taarsigassarsiarineqartut, sanaartugassat Inatsisartut inatsisaanni matumani pineqartunut ilaasut aningaasalersorneqarnissaannut, Nukissiorfinnut imaluunniit aktiaatileqatigiiffimmut Namminersorlutik Oqartussanit pigineqartumut taarsigassarsiariteqqissinnaavaat .”
<b>§ 6.</b> ”Naalakkersuisut pisinnaatitaapput sanaartornermut, aningaasalersuineranut aamma ingerlatsinermut iluaqutissartaqarpat namminersortumut imaluunniit namminersortunut arlaqartunut isumaqatigiissuteqarsinnaanermut sanaartornermut, aningaasalersuineranut aamma ingerlatsinermut sanaartukkanut tunngatillugu, aammalu piffissap ersarinnerusumik aalajangersarneqartup iluani erngup nukinganik iluaquteqarluni nukissiorfiit atortulersuutitaat ilanngullugit	<b>2.</b> § 6 imannak oqaasertalerneqarpoq: ” Suliassat §§ 2-4-mi pineqartunut ilaatinneqartut aningaasartuutillu taakkununnga attuumassuteqartut aktiaatileqatigiiffimmut Namminersorlutik Oqartussanit pigineqartumut tamakkiisumik ilaannakortumilluunniit tunniunneqassasut, Naalakkersuisut aalajangersinnaavaat. <i>Imm. 2.</i> Namminersorlutik Oqartussat aktianit aningaasaatit aammalu taarsigassarsianit aningaasaatit akisussaaffigineqartut akiliutigissagaat pillugu aktiaatileqatigiiffimmi

<p>Naalakersuisunut tunniunneqarsimanissaannik.”</p>	<p>Namminersorlutik Oqartussanit imm. 1 naapertorlugu pigineqartumi taarsigassarsititsisunut avataaneersunut pisussaaffiliisumik uppernarsaanissamut Naalakersuisut piginnaatinneqarput.”</p>
	<p style="text-align: center;"><b>§ 2</b></p> <p>Inatsisartut inatsisaat ulloq 1. decembari 2022 atuutilerpoq.</p>

## Tusarniaanermut allagaat

**Uunga siunnersuut: Nuup kiisalu Qasigiannugit Aasiaallu pilersorneqarnerannut erngup nukinganik nukissiorfinnik taakkunungalugu atatillugu atortunik sanaartornermut, aningaasalersuinermit ingerlatsinermullu killiliussatut atugassarititaasut pillugit Inatsisartut inatsisaat nr. 22, 1. december 2021-meersup allannngortinnissaa pillugu Inatsisartut inatsisaat**

### **Aallaqqaasiut**

Nuup kiisalu Qasigiannugit Aasiaallu pilersorneqarnerannut erngup nukinganik nukissiorfinnik taakkunungalugu atatillugu atortunik sanaartornermut, aningaasalersuinermit ingerlatsinermullu killiliussatut atugassarititaasut pillugit Inatsisartut inatsisaanni (sanaartornermut inatsimmi) ilaasuni erngup nukinganik nukissiorfinnik sanaartornerit aningaasatigut sapinngisamik pitsaanerpaamik aningaasaliinissaq pillugu aalajangiinissamik aamma isumaqatigiissutissamik isumaqatiginninniarnissaq pillugit Naalakkersuisunut annertusisamik pisinnaatitsissummik tunniussaqarnissamik siunnersuut siunertaqarpoq.

### **Inatsisissatut siunnersuummut tamatigoortunik oqaaseqaatit**

Sanaartornermut inatsimmi ilaasunik erngup nukinganik nukissiorfiit sanaartornissaannut aningaasatigut sapinngisamik pitsaanerpaamik aningaasaliinissaq anguniarlugu toqqammavissamik atugassarisanillu isumaqatiginninniarnissamut Naalakkersuisunut pisinnaatitsissutip annertusisinnissaanut tamatigoortumik akuersissuteqartoqartoq tusarniaanerup takutippaa.

### **Kattuffiit, pisorta qarfiit il.il. tusarniaaffigisanut tunngasutut ataatsimut isiginniffik**

Ulloq 3. agusti 2022-mi tusarniaanermut akissuteqarnissamut killiffilerlugu inatsisissatut siunnersuut tamanut ammasumik 3. juuli 2022-mi tusarniaassutaalersimavoq. Piffissami tassani siunnersuut tusarniaanermut allattuiffimmi nalunaarneqartunut pisorta qarfinnut, kattuffinnut, peqatigiiffinnut il.il. nassiunneqarsimavoq:

Avannaata Kommunia  
Kommune Qeqertalik  
Qeqqata Kommunia  
Kommuneqarfik Sermersooq  
Kommune Kujalleq

KANUNUPE

SIK (Sulinermik Inuussutissarsiateqartut Kattuffiat)

Sulisitsisut

Mittarfeqarfiit

Nukissiorfiit

Royal Arctic Line A/S

Asiaq

Grønlandsbanken A/S

BankNordik

Visit Greenland

Transparency Greenland

WWF Greenland

KNAPK

Pinngortitaleriffik

Timmiaq

KNI A/S

Nunatta Kaersugaasivia Allagaateqarfialu

### **Makkunanit tusarniaanermut akissutit tiguneqarput**

- Sulisitsisut
- Kommuneqarfik Sermersooq

Tusarniaanermut allakkamik matumunnga ilaqartillugit tusarniaanermut akissutit [www.naalakkersuisut.gl](http://www.naalakkersuisut.gl)-imi tusarniaassutininik nittartakkami tamanut saqqummiunneqarput.

### **Sulisitsisunit tusarniaanermut akissut**

Sulisitsisut nalunaarpaat:

*”Pitsaanerpaamik aningaasaliinerup pissarsiariniarnissaa sianigalugu erngup nukinganik nukissiorfinnik taakkuninnga marlunnik sanaartornissamik isumaginnittussamik aktianik piginneqatigiiffiup pilersinneqarnissaanik kissaateqartoqarnera Sulisitsisut paasisinnaavaat. Piffissami aalajangersimasumi ingerlatseqatigiiffiup ingerlatsisuunissaa inatsiserpiani erseqqissumik takuneqarsinnaanngilaq, oqaaseqaatinili imatut allassimasoqarluni, ”Siunnersuutikkut makku periarfissinneqalissapput: sanaartornermut inatsimmi ilaasutut erngup nukinganik sanaartorerit, aningaasaliinerit aamma ingerlatsinerit namminersorlutik oqartussat tamakkiisumik imaluunniit ilaannakortumik pigisaattut aktianik piginneqatigiiffimmuut tunniunneqarsinnaanissaat.*

*Nunami maani innaallagialerinerimik ingerlatseqatigiiffinnik marlunnik pilersitsisoqarnissaq tulluartuunngitsoq Sulisitsisut isumaqarfigaat. Nukissiorfiit aktianik*

*piginneqatigiiffinngortinnissaa, imaluunniit Namminersortutut Pisortat Suliffeqarfiannik (Selvstændig Offentlig Virksomhedimik (SOV-imik)) pilersitsisoqarnissaq tulluarnersannnginnersoq isumaliutigisariaqarpoq, allatullu qinigassatut suliniummut ingerlatseqatigiiffiup piffissap aalajangersimasup kingornatigut atorunnaarsinnissaa pillugu aalajangersakkamik inissiisoqartariaqarpoq, tamatuma kingornatigut erngup nukinganik nukissiorfiit Nukissiorfinnut tunniunneqassallutik.*

*Erngup nukinganik nukissiorfiit ingerlannissaannut Nukissiorfiit suli isumaginnittuususaanerat Sulisitsisut naatsorsuutigaat, tamatumunngami Nukissiorfinni piginnaasaqartoqarmat. Nutaamik ingerlatseqatigiiffiortoqassappat Nukissiorfiit ingerlatseqatigiiffiullu nutaap akornanni isumaqatigiissutiliortoqarnissaq qularnaartariaqarpoq, taamaalillutik piginnaasat killeqartut ingerlatseqatigiiffinnut arlalinnut siammartinneqassanngimmata.*

*Pisortanut aningaasatigut kingunerisinnaasanut oqaaseqaatini allassimavoq siunnersuut pisortanut aningaasaqarnikkut imaluunniit allaffissornikkut kingunerisassanik nassataqassanngitsoq.*

*Tamatuma itisilernissaa Sulisitsisut inassutigissavaat, taamaalilluni aktianik piginneqatigiiffiup siulersuisoqarlunilu, pisortaqaqarfeqarlunilu sulisartortaqaqartumik pilersitsinermi aningaasaqarnikkut kingunerisassaqaanngitsoq takuneqarsinnaalissammat. Aktianik piginneqatigiiffiuneratigut ilassutitut aningaasartuutit pitsaanagerusumik aningaasaliinermi naligiissiffiusinnaanissaat pisinnaavoq.*

*Aktianik piginneqatigiiffiiornermi pitsaanagerusumik aningaasaliissutaasumut tassunga naatsorsuutigisanut sanilliullugit taamatut annertussusilersinnaaneratigut aningaasartuutit qanoq annertutiginissaat takuneqarsinnaasariaqarput. Aamma Nukissiorfimmik allanngortitsinermi aningaasaqarnikkut kingunerisassat nassuiarnissaat Sulisitsisut inassutigerusuppaat, taamaalillutik ilutsini taakkunani marlunni aningaasaqarnikkut iluaqutit/ajoqutit sorliuneri takuneqarsinnaassammata.*

### **Naalakkersuisut oqaaseqaataat**

Nukissiorfiit atuisartunik innaallagissamik aamma avataanit kiassarnermik pilersuiuarnissaanik, aammalu Nukissamik pilersuineq pillugu Inatsisartut peqqussutaat nr. 14, 6. novembari 1997-imeersumi aalajangiunneqartutut illoqarfinni nunaqarfinnilu atuisartunut sunniuteqarluartumik naammattumillu innaallagissamik avataaniillu kiassarnermik pilersuinerup attannissaanut Nukissiorfiit allanguuteqaanngitsumik pisussaaffeqarnissaanik siunnersuut allanngortitsinngilaq. Taamaattumik Nukissiorfiit aktianik piginneqatigiiffittut allanngortinnissaanik, imaluunniit Namminersortutut Pisortat

Suliffeqarfiannik (Selvstændig Offentlig Virksomhedimik (SOV-imik)) pilersitaqarnissamik Naalakkersuisut pilersaaruteqanngillat.

Erngup nukinganik nukissiorfinnik sanaartornerup, aningaasaliinerup ingerlatsinerullu Namminersorlutik Oqartussat pigisaattut aktianik piginneqatigiiffimmut tunniunnissaanut siunnersuummi allisatut pisinnaatitsissutip iluaqutiginissaa toqqarneqassappat tamanna sanaartornermut inatsimmi ilaasutut erngup nukinganik nukissiorfinnik sanaartornermut aningaasatigut sapinngisamik pitsaanerpaamik aningaasaliinissaq qulaarnaarniarlugu pissaq. Aktianik piginneqatigiiffik siulersuisoqarlunilu, pisortaqarfeqarlunilu sulisartoqartup pilersinnerani aningaasaqarnikkut kingunerisassat takuneqarsinnaalersillugit itisiliisoqassasoq Sulisitsisut inassutigaa.

Sapinngisamik pitsaanerpaamik aningaasaliinissamik isumaqatiginninniarnep inississinnaanissaa siunertaralugu erngup nukinganik nukissiornermik suliarisat, tassungalu attuumassutilittut pigisat nalillit allatut aaqqissuunnerisigut aningaasaqarnermi naatsorsuuserinermilu tunngasutut kinguneqartitsisoqassanera Naalakkersuisut isumaqatigaat. Ataatsimut nalilersuutaavoq aktianik piginneqatigiiffiliornermut atasutut ilassutitut aningaasartuutit pitsaanerusumik aningaasaliinerup nassatarisaanik sipaarutaasunik naligiissiffiussasut. Taamaattorli aktianik piginneqatigiiffiliornermi aningaasaqarnermi naatsorsuuserinermilu tunngasutut kingunerisassanik inaarutaasumik naatsorsuinerit aatsaat taarsigassarsisisullu tamakkiisumik aningaasaliinissamik piumasaqaatit atugassarisallu pillugit isumaqatigiissuteqareernerisigut naatsorsorneqarsinnaassapput. Namminersorlutik Oqartussat pigisaattut aktianik piginneqatigiiffimmut nutaatut pilersitamik isumaqatigiissuteqarluni Nukissiorfiit erngup nukinganik nukissiorfiit nutaat taakku ingerlatarivinnissaannik isumaginnittussaanaera akunnaatsumik aamma ingerlatsinermut aningaasaqarnikkullu tunngatillugit pinngitsoorani tunngavissaqartoqarneranik tapersersuivoq. Taamaattumik ingerlatseqatigiiffik nutaaq pilersinneqassappat Nukissiorfiit erngup nukinganik nukissiornerup iluani piginnaasaanik sapinngisamik pitsaanerpaamik iluaquteqarniarluni Nukissiorfiit aamma ingerlatseqatigiiffiup taassuma nutaap akornanni isumaqatigiissusiortoqarnissaata qularnaarnissaa Naalakkersuisut Sulisitsisutulli isumaqarfigaat.

### **Kommuneqarfik Sermersuumit tusarniaanermut akissut**

Tusarniaanermut tassunga kommuni oqaaseqaatissaqanngitsoq Kommuneqarfik Sermersuup ilisimatitsissutigisimavaa.